

四庫全書

經部

欽定四庫全書

經部

周禮述註表

卷三

詳校官監察御史_臣施朝幹

刑部郎中_臣許兆椿覆勘

總校官進士_臣朱鈐

校對官員外郎_臣張慎和

謄錄監生_臣王家賓

欽定四庫全書

周禮述註卷三

安溪李光坡撰

○膳夫掌王之食飲膳羞以養王及后世子

註曰食飯也飲酒漿也膳牲肉也羞有滋味者凡養

之具大畧有四疏曰養王及后世子舉尊者而言

其實羣臣及三夫人以下亦養之食音嗣註同

凡王之饋

註曰進物於尊者曰饋此饋之盛者王舉之饌也 史
直翁曰饋者儲之一歲之間隨所欲食而進之非謂
一日之奉而咸備食前也

○食用六穀膳用六牲飲用六清羞用百有二十品珍
用八物醬用百有二十饗

註曰六牲馬牛羊豕犬雞也羞出于牲及禽獸以備
滋味謂之庶羞公食大夫禮內則下大夫十六上大
夫二十其物數備焉天子諸侯有其數而物未得盡

闡珍謂淳熬淳毋炮豚炮牂擣珍漬熬肝腎也醬謂
醢醢也王舉則醢人共醢六十甕以五齏七醢七菹
三鶩實之醢人共齏菹醢物六十甕鄭司農云羞進
也六穀稌黍稷粱麥苽苽雕胡也六清水漿醴醢醫
醢食音嗣註同甕屋貢反熬五刀反毋莫胡反牂
作郎反臂力雕反齏作西反鶩奴兮反稌音杜苽古
吳反醢力涼反醬於計反醢以支反

王日一舉鼎十有二物皆有俎

殺牲盛饌曰舉王日一舉以朝食也后與王同庖鼎
十有二牢鼎九牛羊豕魚腊腸胃同鼎膚鮮魚鮮腊
陪鼎三腳臠臠竝陪牛羊豕鼎後物謂牢鼎之實唯
牢實各在俎陪鼎三者為庶羞則在豆 趙商問王
日一舉鼎十有二是為三牲備焉案玉藻天子日食
少牢朔月大牢禮數不同請聞其說鄭答曰禮記後
人所集據時而言或以諸侯同天子或以天子與諸
侯等禮數不同難以據也王制之灋與禮違者多當

以經為正

以樂侑食膳夫授祭品嘗食王乃食

侑猶勸也王制云天子食日舉以樂祭謂刊肺脊也
禮飲食必祭示有所先品者每物皆嘗之道尊者也
朱子曰古人祭酒於地祭食於豆間有版盛之卒
食撤去

○卒食以樂徹于造

疏曰造作也作食之處即廚是也徹食器之時樂章未聞

○王齊日三舉

疏曰齊謂散齊致齊齊必變食故加牲體至三大牢
玉藻云朔日加日食一等則於此朔食當兩大牢不
言之者文不具齊時不樂故不言以樂侑食也

○大喪則不舉大荒則不舉大札則不舉天地有哉則
不舉邦有大故則不舉

註曰大荒凶年大札疫癘也天哉日月晦食地哉崩
動也大故寇戎之事及刑殺也

○王燕食則奉膳贊祭

註曰燕食謂日中與夕食奉膳奉朝之餘膳所祭者

牢肉 齊音齋註同裁音災剗寸本反

凡王祭祀賓客食則徹王之胾俎

註曰膳夫親徹胾俎胾俎最尊也其餘則其屬徹之

疏曰祭祀謂祭宗廟有胾俎者謂若特牲少牢主

人受尸酢尸東西面設主人俎于席前王受尸酢禮

亦當然賓客食王與賓客禮食于廟賓在戶牖之間

王在阼階上各有饌皆設俎故亦有阼俎案公食大夫主君與聘大夫禮食賓前有席君前無席退俟于廟此天子于諸侯異于諸侯與聘大夫故王前有俎公食之食音嗣

凡王之稍事設薦脯醢

註曰稍事有小事而飲酒

王燕飲酒則為獻主

註曰鄭司農云主人當獻賓則膳夫代王為主君不

敵臣也燕義曰使宰夫為獻主臣莫敢與君亢禮

掌后及世子之膳羞

註曰亦主其饌之數不饋之耳 疏曰內饗共后及

世子之膳羞則后世子內饗饋之

凡肉脩之頒賜皆掌之

註曰加薑桂鍛治者謂之脩加薑桂以鹽乾之者謂

之脯 鍛多貫反

凡祭祀之致福者受而膳之

註曰致福謂諸臣祭祀進其餘肉歸胙于王 薛士
龍曰夏官祭僕凡祭祀之致福展而受之則膳夫之
所受受于祭僕也

○以摯見者亦如之

註曰鄭司農云以羔鴈雉為摯者亦受以給王膳
薛士龍曰夏官司士掌摯士者膳其摯則膳夫之所
受受于司士也

歲終則會唯王及后世子之膳不會

註曰不會計多少優尊者其頒賜諸臣則計之 坡
謂大府職云關市之賦以共王之膳服末云歲終則
以貨賄之入出會之是凡貢賦及九式皆會未嘗別
言王之膳服不會也然則膳夫不會王后世子之膳
外府不會王后之服以會之在大府耳豈可動引周
官唯王不會哉 會古外反

○庖人掌共六畜六獸六禽辨其名物

六畜六牲也始養之曰畜將用之曰牲春秋傳曰卜

日曰牲六獸麋鹿狼麋野豕兔六禽羔豚犢麋雉鴈
凡鳥獸未孕曰禽司馬職曰大獸公之小禽私之而
宗伯以禽作六摯禽中有羔可見矣或曰鴈鶉鵒雉
鵠鵠為六禽夏官校人羊人地官牛人春官雞人秋
官犬人冬官豕人總送六畜與庖人六獸六禽即獸
人送之庖人得此共與膳夫內外饗故云掌共也名
號也物物色 麋居倫反麋音迷鶉音純鶉於諫反
鵠古合反

凡其死生鱻鼈之物以其王之膳與其薦羞之物及后世子之膳羞

註曰凡計數之薦亦進也備品物曰薦致滋味乃為羞王言薦者味以不褻為尊鄭司農云鱻謂生肉鼈謂乾肉鱻悉然反後同鼈古老反後同

其祭祀之好羞

祭祀尋常所共者皆在內外饗此言好羞乃非常之物進之孝也

共喪紀之庶羞賓客之禽獻

註曰喪紀喪事之祭謂虞祔也禽獻獻禽于賓客

疏曰凡喪未葬以前無問朝夕奠及大奠皆無薦羞之灋庶羞虞祔之祭乃有之

○凡令禽獻以灋授之其出入亦如之

註曰令令獸人也禽獸不可久處賓客至將獻之庖人乃令獸人取之必書所當獻之數與之及其來致禽亦以此書校數之至于獻賓客又以此書付使者

展而行之掌客乘禽于諸侯各如其命之數聘禮乘
禽于客日如其饗餼之數士中日則二雙

凡用禽獻春行羔豚膳膏香夏行腍鱮膳膏臊秋行犢
麋膳膏腥冬行魚鱉羽膳膏羶

註曰用禽獻謂煎和以獻于王膏香牛脂也腍乾雉
鱮乾魚膏臊犬膏也膏腥雞膏也魚鱉也羽鴈也膏
羶羊脂也羔豚物生而肥犢與麋物成而克腍鱮曠
熟而乾魚鴈水涸而性定此八物者得四時之氣尤

盛為人食之弗勝是以用休廢之脂膏煎和膳之牛
屬司徒土也雞屬宗伯木也犬屬司寇金也羊屬司
馬火也 疏曰言行者義與用同 脍其居反鱠所
留反臊素刀反羶書然反瞋呼旱反

歲終則會唯王及后之膳禽不會

註曰膳禽四時所膳禽獻加世子可以會之

○內饗掌王及后世子膳羞之割亨煎和之事辨體名
肉物辨百品味之物

註曰割肆解肉也亨煮也煎和齊以五味體名脊脅
肩臂之屬肉物載燔之屬百品味庶羞之屬言百舉
成數肆託厯反齊才細反

王舉則陳其鼎俎以牲體實之

陳其鼎俎者陳鼎有二處初陳鼎于鑊西取牲體于
鑊以實鼎後陳鼎于阼階下其俎皆陳于鼎西南取
于鼎以實俎實鼎曰胥實俎曰載

○選百羞醬物珍物以俟饋

註曰先進食之時恒選擇其中御者 鑊音獲胥職

升反

共后及世子之膳羞

註曰膳夫掌之是乃共之

辨腥臊羶香之不可食者牛夜鳴則腐羊冷毛而毳羶
犬赤股而躁臊鳥鵠色而沙鳴豕盲眦而交睫腥馬
黑脊而般臂螻

註曰腥臊羶香可食者是別其不可食者則所謂者

皆臭味也冷毛長毳總結也鰾失色不澤美也沙澌
也交睫腥腥當為星聲之誤也肉有如米者似星般
臂臂毛有文鄭司農云腐朽木臭也螻螻蛄臭也杜
子春云盲眊當為望眊 腐音由冷音零毳昌瑞反
鰾芳表反眊音鬱盲亡亮反睫音接般音班螻音樓
別彼列反澌音西

凡宗廟之祭祀掌割烹之事凡燕飲食亦如之凡掌共
羞脩刑膳胖骨鱠以待共膳

宗廟之祭祀者內饗不掌外神也言凡者謂四時及
禘祫并月祭皆在其中掌割亨不言煎和者鬼神尚
質不貴褻味燕飲與諸臣燕燕食日中及夕食也掌
共共當為其羞庶羞也脩鍛脯也刑鉶羹也膾臠肉
大臠所以祭者胖半體骨牲體也鱠乾魚 膾火吳
反後同胖普半反鉶音刑臠直輒反臠力轉反

凡王之好賜肉脩則饗人共之

註曰好賜王所善而賜也 好呼報反

○外饗掌外祭祀之割亨共其脯脩刑膾陳其鼎俎實之牲體魚腊凡賓客之飧饗饗食之事亦如之

外祭祀謂天地四望山川社稷五祀凡外神皆是也
殮客始至之禮饗既將幣之禮致禮于客莫盛于饗

食音嗣

邦饗耆老孤子則掌其割亨之事饗士庶子亦如之

耆老謂死事者之祖父兼有國老庶老孤子死事者
之子也士庶子衛王官者

師役則掌其其獻賜脯肉之事

註曰獻謂酌其長帥

凡小喪紀陳其鼎俎而實之

疏曰小喪紀謂夫人以下之喪陳其鼎俎者殷奠及虞祔之祭皆有鼎俎

○亨人掌其鼎鑊以給水火之齊

註曰鑊所以煮肉及魚腊之器既熟乃胥于鼎齊多少之量 疏曰謂實水于鑊及爨之以火皆有多少

之齊

○職外內饗之饗亨煮辨膳羞之物

註曰職主也饗今之竈主于其竈煮物 疏曰膳羞

則牢鼎之物也 齊才細反

祭祀共大羹鉶羹賓客亦如之

疏曰大羹肉湑盛于登謂太古之羹不調以鹽菜及

五味鉶羹者皆是陪鼎腳臠臠牛用藿羊用苦豕用

薇調以五味盛之于鉶器即謂之鉶羹若盛之于豆

即謂之庶羞賓客亦如之者謂致饗餼及殮皆有陪
鼎則鉶羹也饗食亦應有大羹 音去及反盛音成

○甸師掌帥其屬而耕耨王藉以時入之以共盥盛

註曰其屬府史胥徒也耨芸芋也王以孟春躬耕帝
藉天子三推三公五推卿諸侯九推庶人終于千畝
庶人謂徒三百人藉之言借也王一耕之而使庶人
芸芋終之盥盛祭祀所用穀也粢稷也穀者稷為長
是以名云在器曰盛 疏曰以時入之者謂麥則夏

熟禾黍秋熟則十月穫之送入地官神倉 師音率
擗乃豆反蠶音資茅音子推出誰反

祭祀共蕭茅

註曰鄭大夫云蕭字或為苜苜讀為縮束茅立之祭
前沃酒其上酒滲下去若神飲之故謂之縮縮浚也
杜子春讀為蕭蕭香蒿也玄謂詩所云取蕭祭脂郊
特牲云蕭合黍稷臭陽達于牆屋故既薦然後燔蕭
合馨香合馨香者是蕭之謂也茅以共祭之苴亦以

縮酒苴以藉祭縮酒涕酒也醴齊縮酌疏曰蕭祭
宗廟時有之共茅則內外之神俱用

○共野果蓏之薦

註曰甸在遠郊之外郊外曰野果桃李之屬蓏瓜瓠
之屬滲所鵠反熇如悅反苴音租涕子禮反齊才
細反

喪事代王受胄戮

其義未詳

○王之同姓有皐則死刑焉

註曰鄭司農云文王世子曰公族有死皐則磬于甸
人又曰公族無官刑獄成致刑于甸人又曰公族無
官刑不踐其類也刑于隱者不與國人慮兄弟 青
生景反皐罪本字踐音翦

帥其徒以薪蒸役外內饗之事

註曰役為給役也木大曰薪小曰蒸

○獸人掌罟田獸辨其名物冬獻狼夏獻麋春秋獻獸

物

苦罔也狼似犬銳頭白頰高前廣後山獸也山是聚
故狼膏聚聚則溫於冬獻之麋澤獸也澤主銷散故
麋膏散散則涼于夏獻之皆以救時之苦也春秋寒
溫適凡獸皆可獻之

○時田則守罟

時田謂四時田獵守罟者備獸觸罟而攫則取之

及弊田今禽注于虞中

弊止也注聚也弊田謂春火弊夏車弊秋羅弊冬徒
弊虞中謂虞人釐所田之野及弊田植虞旗于其中
致禽而弭焉獸人主令田衆得禽者置虞人所立虞
旗之中當以給四時廟社之祭 𣎵音古攬俱縛反
釐音來

凡祭祀喪紀賓客共其死獸生獸

共其完者于庖人

凡獸入于腊人

使乾之以為脯脩不必皆完也

皮毛筋角入于王府

註曰給作器物

凡田獸者掌其政令

凡田凡庶民之田也政令如豺祭獸然後田獵及不麇不卵之類

○獻人掌以時獻為梁

註曰鄭司農云梁水偃也偃水為關空以筍承其空

詩曰敝笱在梁 疏曰取魚之灋歲有五月令孟春
云獺祭魚此時得取一也季春云薦鮓于寢廟二也
鼈人云秋獻龜魚三也王制云獺祭魚然後虞人入
澤梁與孝經緯云陰用事木葉落獺祭魚是十月得
取魚四也獺則春冬二時祭魚也潛詩云季冬薦魚
與月令季冬漁人始漁同五也惟夏不取魯語云宣
公夏濫于泗淵里革諫之以其非時

春獻王鮓

鮪鱸屬頭小而銳口在頷下王鮪鮪之大者出河南
鞏縣至春浮陽乃入西河至漆沮上龍門故周人取
以獻新獻所無也月令季春薦鮪于寢廟

○辨魚物為鱻鼈以共王膳羞

疏曰此所共者共于膳夫以共王 鮪音委空音孔
筍音苟鱸音旗頷戶感反鞏弓上聲

凡祭祀賓客喪紀共其魚之鱻鼈

疏曰此所共者共內外饗以其膳夫即不掌祭祀之

事

凡獻者掌其政令凡獻征入于王府

疏曰近川澤之民于十月獺祭魚之時亦得取魚水族之類其中鬚骨之事堪飾器物者所有征税漁人收之入王府

○鼈人掌取互物

互物有甲介者謂龜鼈之屬

以時簎魚鼈龜蜃凡羶物

註曰蜃大蛤鄭司農云簠謂以杓刺泥中搏取之狸
物龜鼈之屬自狸藏伏于泥中者玄謂狸物亦謂鰕
刀含漿之屬疏曰以時即下春秋若然簠魚鼈據
所取下經據所獻其時一也

春獻鼈蜃秋獻龜魚

註曰此其出在淺處可得之時魚亦謂自狸藏
簠

勅角反蜃時軫反狸音埋杓音義鰕音滅

祭祀共廬羸蜺以授醢人

麤蟀也。羸，蟻。蚘，蟻。蚘，蟻。子白者可為醢。麤，薄。佳反。羸，郎戈反。蚘，直其反。蟀，蒲項反。蟻，音夷。蚘，音由。

掌凡邦之簠事

○腊人掌乾肉凡田獸之脯腊膾胖之事

註曰：大物解肆乾之，謂之乾肉。薄析曰脯。極之而施薑桂曰脩。腊，小物全乾。疏曰：趙商問：掌乾肉而有膾，胖何鄭答？雖鮮亦屬腊人。肆，勅力反。極之，藥反。凡祭祀共豆脯薦脯膾胖凡腊物。

註曰脯非豆實豆當為羞聲之誤也膾臠肉大臠所以祭者 坡謂有司徹曰加膾祭于其上是也脾半體也少牢曰司馬升羊右脾司士升豕右脾是也

賓客喪紀共其脯腊凡乾肉之事

疏曰此所共者共內外賓也

○醫師掌醫之政令聚毒藥以共醫事

註曰毒藥藥之辛苦者藥之物恒多毒 吳氏曰凡

藥有有毒者有無毒者無毒所以療病有毒所以發

病而藥物之性隨四時而生死金石之性稟五行而厚薄其類不一其性必偏而人之身感陰陽寒暑之偏而有病病以偏而感藥以偏而用必相攻而後相濟用之不善則無毒者亦毒矣必欲醫者知用藥之為毒而不敢輕辨君臣佐使之制調溫涼燥濕之宜審表裏吐內之方達造化性命之理則雖毒不毒矣故其職以聚毒藥為主者重之也 療力弔反內

音納

凡邦之有疾病者疔瘍者造焉則使醫分而治之

註曰疔頭瘍亦謂禿也身傷曰瘍分之者醫各有能

疔匹婢反造七報反

歲終則稽其醫事以制其食十全為上十失一次之十失二次之十失三次之十失四為下

註曰食祿也全猶愈也以失四為下者五則半矣或不治自愈 程子曰以十全為上非謂十人皆愈為上若十人不幸皆死則奈何但知可治不可治者十

人皆中即為上耳 中去聲

○食醫掌和王之六食六飲六膳百羞百醬八珍之齊
疏曰六食已下皆膳夫所掌此主調和而已其六食
等義竝在膳夫

凡食齊眠春時羹齊眠夏時醬齊眠秋時飮齊眠冬時
註曰飯宜溫羹宜熱醬宜涼飮宜寒 疏曰眠猶比
也 和胡臥反六食以下皆音嗣齊才細反下同

凡和春多酸夏多苦秋多辛冬多鹹調以滑甘

註曰各尚其時味而甘以成之猶水火金木之載于土內則曰棗栗飴蜜以甘之薑荳枌榆婉槁滑瀉以滑之 史直翁曰非謂四時各專一味謂之多者就五味中使一味勝焉以養其氣也如春則肝用事用則勞勞則損損則四藏勝而疾生焉曲直作酸惟酸為主可以引諸味以益肝氣而使適平夏之苦秋之辛冬之鹹莫不皆然 和胡臥反飴以之反薑音謹 荳音桓枌符云反婉音問滑思酒反瀉相藥反

凡會膳食之宜牛宜稌羊宜黍豕宜稷犬宜粱鴈宜麥
魚宜菰

會成也謂其味相成牛味甘平稌稻也所謂芒種味
苦而溫此甘苦相成也羊味甘熱黍穀名苗似蘆高
丈餘穗黑色實圓重味苦而溫亦甘苦相成也豕牡
者味酸牝者味苦稷亦穀也一名稌似黍而小或曰
粟也味甘皆甘苦相成也犬味酸而溫粱粟類有數
色味甘而微寒此氣味相成也鴈味甘平大麥味酸

而溫小麥味甘微寒亦氣味相成也苽生澤中葉如
蕉荻莖梗秋生米即芡苗米也魚族甚多寒熱酸苦
俱有而宜苽者或同是水物 食音嗣稌子計反蕉
之夜反荻音敵梗音庚芡音交

凡君子之食恒放焉

註曰放猶依也 疏曰上六食六飲一節為共王者
不通放也自凡和以下至魚宜苽齊和相成之事雖
以王為主君子大夫已上亦依之 放甫往反

○疾醫掌養萬民之疾病四時皆有癘疾春時有瘡首
疾夏時有痒疥疾秋時有瘧寒疾冬時有嗽上氣疾

註曰癘疾氣不和之疾瘡酸削也首疾頭痛也嗽咳
也上氣逆喘也 吳氏曰凡入四時之間冬傷于寒

陽主于內春木用事而陽發于外然後寒氣搏之為
瘡首之疾春木為肝而主色火勝于夏以子勝母故
暑氣溢而為痒疥之疾夏傷于暑陰主于內秋金用
事而陰發于外然後暑氣搏之為瘧寒之疾秋金為

肺而主聲水勝于冬以子勝母故寒氣壅而為嗽上
氣疾是四者皆四時不和之氣故謂之癰 瘡音消
痒以掌反疥音介嗽西豆反上時掌反咳音慨喘昌
克反

以五味五穀五藥養其病

註曰養猶治也病由氣勝負而生攻其羸養其不足
者五味醢酒飴蜜薑鹽之屬五穀麻黍稷麥豆也五
藥草木蟲石穀也其合治之齊則存乎神農子儀之

術云 王介甫曰素問曰形不足溫之以氣精不足
補之以味味養精者也穀養形者也藥則療病者也
養精為本養形為次療病為末 羸音盈齊音劑

以五氣五聲五色眡其死生

三者劇易之徵見于外者五氣肝氣溫心氣熱脾氣
和肺氣涼腎氣寒五聲肝聲呼心聲嘆脾聲歌肺聲
哭腎聲呻五色面貌青赤黃白黑也察其盈虛休王
吉凶可知審用此者莫若扁鵲倉公 易以豉反王

往放反

兩之以九竅之變參之以九藏之動

註曰兩參之者以觀其死生之驗竅之變謂開閉非常陽竅七陰竅二藏之動謂脈之至與不至正藏五又有胃膀胱大腸小腸脈之大候要在陽明寸口能專是者其惟秦和乎歧伯榆柎則兼彼數術者疏曰兩參之者謂九竅與所眊為兩兩與九藏為參竅苦弔反藏才浪反柎音附

凡民之有疾病者分而治之死終則各書其所以而入于醫師

註曰少者曰死老者曰終所以謂治之不愈之狀也
醫師得以制其祿且為後治之戒 王氏曰食醫瀆
通于下而以王為主卑者不能備物也疾醫瀆通于
上而以萬民為主尊者不敢斥言也 少詩照反

○瘍醫掌腫瘍潰瘍金瘍折瘍之祝藥劑殺之齊

註曰腫瘍癰而上生創者潰瘍癰而含膿血者金瘍

刀創也折瘍踣跌者剗刮去膿血殺謂以藥食其惡肉 鄭剛中曰王氏謂疾之惡者藥或不能攻則有祝焉乃引素問移精變氣祝由之說為證 坡謂古字可通似不必改如此官既有獸醫而夏官又有巫馬疏云巫知馬祟醫知馬疾疾則以藥治之祟則辨而祈之然則祝藥竝行牛馬猶然而況于人乎王說是也 折時設反剗音刮殺所賣反齊才細反創初良反踣於阮反跌待結反祟音歲

凡療瘍以五毒攻之

註曰止病曰療攻治也五毒五藥之有毒者今醫方有五毒之藥作之合黃堊置石膽丹砂雄黃礬石慈石其中燒之三日三夜其煙上著以雞羽掃取之以注創惡肉破骨則盡出

○以五氣養之以五藥療之以五味節之

註曰既刮殺而攻盡其宿肉乃養之也五氣當為五穀字之誤也節節成其藥之力 氣讀作穀堊音務

譽音豫著直畧反

凡藥以酸養骨以辛養筋以鹹養脈以苦養氣以甘養肉以滑養竅

註曰以類相養也酸木味木根立地中似骨辛金味金之纏合異物似筋鹹水味水之流行地中似脈苦火味火出入無形似氣甘土味土含載四者似肉滑滑石也凡諸滑物通利往來似竅疏曰上文以五味節之即此經酸苦之等是也今云凡藥以酸養骨

藥味合言者欲見五味節成五藥故合言之

凡有瘍者受其藥焉

○獸醫掌療獸病療獸瘍

疏曰上之人病與瘍別醫此獸之疾病及瘍療同醫者重人賤畜故畧同在一醫也

凡療獸病灌而行之以節之以動其氣觀其所發而養之

註曰療獸必灌行之者為其病狀難知灌以緩之且

強其氣也節趨驟之節也氣謂脈氣既行之乃以脈視之以知所病

凡療獸瘍灌而劑之以發其惡然後藥之養之食之

註曰亦先攻之而後養之 食音嗣

凡獸之有病者有瘍者使療之死則計其數以進退之
○酒正掌酒之政令以式灋授酒材

註曰式灋作酒之灋式作酒既有米麴之數又有功沽之巧月令曰乃命大酋秬稻必齊麴蘖必時湛餽

必潔水泉必香陶器必良火齊必得鄭司農云授酒
人以其材

○凡為公酒者亦如之

註曰謂鄉射飲酒以公事作酒者亦以式灋及酒材
授之使自釀之 酋將由反齊才細反湛接庶反饕
昌志反釀女亮反

辨五齊之名一曰泛齊二曰醴齊三曰盎齊四曰緹齊
五曰沈齊

註曰泛者成而滓浮泛泛然醴猶體也成而滓汁相
將盎猶翁也成而翁翁然葱白色緹者成而紅赤沈
者成而滓沈自醴以上尤濁縮酌者盎以下差清其
象類則然古之式灋未可盡聞杜子春讀齊皆為淩
玄謂齊者每有祭祀以度量節作之 疏曰辨五齊
之名者酒正不自造酒使酒人為之酒正辨其名知
其清濁而已 齊才細反下同緹音體翁鳴動反

辨三酒之物一曰事酒二曰昔酒三曰清酒

註曰鄭司農云事酒有事而飲也昔酒無事而飲也
清酒祭祀之酒玄謂事酒酌有事者之酒其酒則今
之醪酒也昔酒今之酋久白酒所謂舊醪者也清酒
今中山冬釀接夏而成 疏曰事酒謂于祭末卑賤
執事之人竝得飲之昔酒亦祭末羣臣陪位不得行
事竝得飲之清酒祭祀時賓獻尸尸酢賓不敢與王
之神共尊同酌齊故酌清以自酢此三酒皆盛于罍
尊在堂下 醪音亦

辨四飲之物一曰清二曰醫三曰漿四曰醕

註曰清謂醴之沛者醫內則所謂或以醕為醴凡醴
濁釀醕為之則少清矣醫之字從毆從酉省也漿今
之載漿也醕今之粥內則有黍醕醕飲粥稀者之清
也 疏曰漿亦是酒類載之言載米汁相載也 醫
於已反下同醕以支反下同沛子禮反下同毆烏兮反
載昨再反

掌其厚薄之齊以共王之四飲三酒之饌及后世子之

飲與其酒

掌其厚薄之齊者從五齊以下皆酒人漿人作之酒
正不自造直辨其厚薄之齊而已饌謂饌陳具設之
也后世子不言饌其饋食不必具設之五齊止用醴
為飲者取醴恬與酒味異也其餘四齊味皆似酒
凡祭祀以灋其五齊三酒以實八尊大祭三貳中祭再
貳小祭壹貳皆有酌數唯齊酒不貳皆有器量

註曰酌器所用注尊中者數量之多少未聞鄭司農

云三貳三益副之也杜子春云齊酒不貳謂五齊以祭不益也其三酒人所飲者益也弟子職曰周旋而貳惟嘽之視玄謂大祭者王服大裘衮冕所祭也中祭者王服鷩冕毳冕所祭也小祭者王服希冕玄冕所祭也三貳再貳一貳者謂就三酒之尊而益之以飲諸臣若今常滿尊也祭祀必用五齊者至敬不尚味而貴多品疏曰凡祭祀者兼天地及宗廟之等也以灋共五齊三酒者祭有大小齊有多少各有常

灋也八尊者五齊五尊三酒三尊此除明水玄酒若
五齊加明水三酒加玄酒此八尊為十六尊不言之
者舉其正尊而言也 噉苦簞反驚必列反羣克芮

反

共賓客之禮酒共后之致飲于賓客之禮醫酺糟皆使
其士奉之

禮酒謂王有故不親饗燕傳人致酒于客館也王致
酒后致飲夫婦之義糟醫酺不涕者涕曰清不涕曰

糟后致飲無醴醫醢不清者與王同體屈也亦因以少為貴士謂酒人漿人奄人

凡王之燕飲酒其其計酒正奉之

註曰其其計者獻酬多少度當足也故書酒正無酒字鄭司農云正奉之酒正奉之也鄭剛中曰不參計于禮飲而奉于燕飲使王知其過多則自為之戒度徒洛反

凡饗士庶子饗耆老孤子皆其其酒無酌數

註曰要以醉為度

掌酒之賜頒皆有灋以行之

註曰灋尊卑之差 疏曰行之者謂依灋給之

凡有秩酒者以書契授之

註曰鄭司農云秩常也玄謂所秩者謂老臣王制曰
九十日有秩 王介甫曰授以書者使知其所得
之數授以契者使執之以取酒也

酒正之出日入其成月入其要小宰聽之

註曰出謂授酒材及用酒之多少也受用酒者日言其計于酒正酒正月盡言于小宰 王介甫曰特謹其出異于其餘物誌酒之意也

○歲終則會唯王及后之飲酒不會以酒式誅賞

註曰誅賞作酒之善惡者 誌必履反

○酒人掌為五齊三酒祭祀則共奉之以役世婦

註曰世婦謂宮卿之官掌女宮之宿戒及祭祀比其具酒人共酒因留與其奚為世婦役亦官聯 齊才

細反比扶利反

共賓客之禮酒飲酒而奉之

註曰酒正使之也禮酒饗燕之酒飲酒食之酒此謂
給賓客之稍王不親饗燕不親食而使人各以其爵
以酬幣侑幣致之則從而以酒往親食之食音嗣
凡事共酒而入于酒府

凡事謂王之三酒之饌及燕飲之酒也共而入于酒
正之府者酒正當奉之

凡祭祀共酒以往

註曰不言奉小祭祀 王介甫曰自有奉之者往待其令而已

○賓客之陳酒亦如之

陳酒謂饗餼之酒使卿以韋弁歸之亦自有奉之者以酒從往 雜記曰武王酒誥以祭祀為說其說為人子者當孝養父母而不敢飲為人臣者當惟王正事而不敢飲其里居者則以助成王德顯不惟不敢

亦不暇其敘所聞則以在昔商先哲王迪畏天顯小民不敢自逸是則君民臣子皆不當飲惟祭祀賓客方用之立灋之嚴正與酒正酒人相表裏

○漿人掌共王之六飲水漿醴涼醫酏入于酒府

註曰王之六飲亦酒正當奉之醴醴清也涼今寒粥若糗飯雜水也酒正不辨水涼者無厚薄之齊 糗
丘酉反

共賓客之稍禮

註曰稍禮非飧饗之禮留間王稍所給賓客者漿人所給亦六飲而已

○共夫人致飲于賓客之禮清醴鬯醴糟而奉之

註曰亦酒正使之三物有清有糟夫人不體王得備之禮飲醴用柶者糟也不用柶者清也 間如字徐音潤柶音四

凡飲共之

註曰謂非食時

○凌人掌冰正歲十有二月令斬冰三其凌

註曰正歲季冬火星中大寒冰方盛之時春秋傳曰
火星中而寒暑退凌冰室也三之者為消釋度也故
書正為政鄭司農云掌冰政主藏冰之政也杜子春
讀掌冰為主冰也政當為正正謂夏正三其凌三倍
其冰 疏曰周雖以建子為正行事皆用夏之正歲
若據殷周則十二月冰未堅若據夏之十二月冰則
堅厚故正歲據夏也

春始治鑑

註曰鑑如甄大口以盛冰置食物于中以禦溫氣春而始治之為二月將獻羔而啓冰

○凡外內饗之膳羞鑑焉凡酒漿之酒醴亦如之

註曰酒醴見溫氣亦失味酒漿酒人漿人也 甄直

偽反

祭祀共冰鑑賓客共冰

註曰賓客不以鑑往嫌使停膳羞

大喪之夷槃冰

註曰夷之言尸也實冰于夷槃中置之尸牀之下所以寒尸漢禮器制度大槃廣八尺長丈二尺深三尺漆赤中疏曰亦謂三月以後遭大喪則共之舉王喪共后世子及三夫人以下小喪亦共之但王及后有夷槃自外當與諸侯已下同大槃等其世婦已上有冰則與大夫同女御與士同無冰見賜乃有也

夏頒冰掌事

註曰暑氣盛王以冰頒賜則主為之

秋刷

註曰刷清也鄭司農云刷除冰室當更內新冰玄謂

秋涼冰不用可以清除其室 刷所劣反

籩人掌四籩之實

註曰籩竹器如豆者其容實皆四升

朝事之籩其實麴黃白黑形鹽膾鮑魚鱠

註曰黃泉實也鄭司農云熬麥曰麴麻曰黃稻曰白

黍曰黑粢鹽以為虎形謂之形鹽故春秋傳曰鹽虎
形玄謂朝事謂祭宗廟薦血腥之事膾臠生魚為大
臠鮑者於楅室中糗乾之鱠者析乾之王者備物近
者腥之遠者乾之因其宜也 麴芳弓反黃符文反
鱠所求反楅皮逼反乾音干

饋食之籩其實棗栗桃乾榛榛實

註曰饋食薦孰也今吉禮存者特牲少牢諸侯之大
夫士祭禮也不裸不薦血腥而自薦孰始是以皆云

饋食之禮乾蓀乾梅也有桃諸梅諸是其乾者榛似栗而小 栗古栗字乾音干蓀力到反

加籩之實菱芡臬脯菱芡臬脯

註曰加籩謂尸既食后亞獻尸所加之籩重言之者以四物為八籩菱芡也芡雞頭也臬與饋食同鄭司農云菱芡脯脩 菱音陵芡音儉重直用反芡其寄反

羞籩之實糗餌粉餐

疏曰羞籩謂若少牢賓長致爵受酢宰夫羞房中之羞于尸祝主人主婦之右天子之禮賓長受酢後亦當設此內羞于尸祝及王與后也糗熬大豆與米也粉豆屑也坡謂餌粉餅也說文云餌屑米為粉然後水調之糗稻餅也謂炊米爛而搗之粉糗以豆為粉糗糗上也糗之言滋也餌之言堅潔若玉珥也餌而志反糗昨資反炊音吹糗素感反後同珥音二凡祭祀共其籩薦羞之實

疏曰祭祀言凡謂四時禘祫等薦者先薦後獻祭祀也據朝踐饋獻時未獻前所薦之籩豆是也羞者謂尸食後醑尸訖所進羞即加籩之實是也 醑音孕

喪事及賓客之事共其薦籩羞籩

註曰喪事之籩謂殷奠時 疏曰殷奠朔月月半薦

新祖奠遣奠之類也

為王及后世子共其內羞

註曰於其飲食以共房中之羞

○凡邊事掌之

禮運孔疏曰祭日之旦王服袞冕而入尸亦袞冕
祝在後侑之王不出迎尸故祭統云君不迎尸以
別嫌也尸入室乃作樂降神故大司樂云凡樂圜
鍾為宮九變而致人鬼是也乃灌故書云王入大
室裸當灌之時衆尸皆同在大廟中依次而灌所
灌鬱鬯小宰注云尸祭之啐之奠之是為一獻也
王乃出迎牲后從灌二獻也迎牲而入至于庭故

禮器云納牲詔于庭王親執鸞刀啓其毛而祝以
血毛告于室故禮器云血毛詔于室凡牲則廟各
別牢故公羊傳云周公白牡魯公騂牝案逸禮云
毀廟之主昭共一牢穆共一牢於是行朝踐之事
尸出于室太祖之尸坐于戶西南面其主在右昭
在東穆在西相對坐主各在其右故鄭注祭統云
天子諸侯之祭朝事延尸于戶外是以有北面事
尸之禮祝乃取牲脾膋燎于爐炭入以詔神于室

又出以墮于主前郊特牲云詔祝于室坐尸于堂是也王乃洗肝于鬱鬯而燔之以制于主前所謂制祭次乃升牲首于室中置于牀牖下后薦朝事之豆籩乃薦腥于尸主之前謂之朝踐即此禮運薦其血毛腥其俎是也其體解以湯燜之不全熟次于腥而薦之堂竝當朝踐之節王乃以玉爵酌著尊泛齊以獻尸三獻也后又以玉爵酌著尊醴齊以亞獻四獻也乃退而合烹至薦熟之時陳于

堂故禮器云設饌于堂乃後延主入室太祖東面
昭在南面穆在北面徙堂上之饌于室內坐前祝
以尊爵酌奠于饌南故郊特牲註云天子奠尊諸
侯奠角卽此之謂也既奠之後又取腸間脂燭蕭
合馨薌郊特牲註云奠謂薦熟時當此大合樂也
自此以前謂之接祭乃迎尸入室舉此奠尊主人
拜以安尸故郊特牲云舉尊角拜安尸是也后薦
饋獻之豆籩王乃以玉爵酌壺尊盞齊以獻尸為

五獻也后又以玉爵酌壺尊醴齊以獻尸是六獻也于是尸食十五飯訖王以玉爵因朝踐之尊泛齊以醕尸為七獻也故鄭云變朝踐云朝獻尊相因也朝獻謂此王醕尸因朝踐之尊也后乃薦加豆籩尸酌酢主人主人受嘏王所以獻諸侯于是后以瑤爵因酌饋食壺尊醴齊以醕尸為八獻也鄭註司尊彝云變再獻為饋獻者亦尊相因也再獻后醕尸獻謂饋食時后之獻也于時王可以瑤

爵獻卿也諸侯為賓者以瑤爵酌壺尊醴齊以獻尸為九獻九獻之後謂之加爵案特牲有三加則天子以下加爵之數依尊卑不祇三加也故特牲三加爵別有嗣子舉奠文王世子諸侯謂之上嗣舉奠亦當然其魯及王者之後皆九獻其行之瀆與天子同侯伯七獻朝踐及饋獻時君皆不獻于九獻之中減二故為七獻也禮器云君親制祭夫人薦盎君親割牲夫人薦酒是也子男五獻者亦

以薦腥饋熟二君皆不獻醢尸之時君但一獻而
已九獻之中去其四故為五獻皆崔氏之說今案
特牲少牢尸食之後主人主婦及賓備行三獻主
婦因獻而得受酢今子男尸食之後但得一獻夫
又不得受酢不如卿大夫理亦不通蓋子男饋熟
以前君與夫人竝無獻也食後行三獻通二灌為
五也禮器所云據侯伯七獻之制也 𦵏音剛脾
音律臂力雕反燎音聊燔音煩爛音潛著直畧反

筭音稼炤如悅反薺音香醢音醢祇祇同

○醢人掌四豆之實朝事之豆其實韭菹醢醢昌本麋
鷄菁菹鹿鷄茆菹麋鷄

註曰醢肉汁也昌本昌蒲根切之四寸為菹三鷄亦
醢也作醢及鷄者必先膊乾其肉乃後莖之雜以粱
麴及鹽漬以美酒塗置瓶中百日則成矣有骨為鷄
無骨為醢菁蔓菁也茆鳧葵即苣菜也凡菹醢皆以
氣味相成其狀未聞疏曰豆木器豆與籩竝設節

數與四籩同時皆后設之 韭音久醢吐感反齧乃

兮反茆音卯麋京倫反膊普博反莖倉臥反

饋食之豆其實葵菹羸醢脾析麋醢蜃蜆醢豚拍魚醢

葵菜名味甘滑羸蠃蟪脾析牛百葉也麋蛤也蜃大

蛤蜆蟻子拍為膊豚拍豚脇也 拍音博

加豆之實芹菹兔醢深蒲醢醢落菹鴈醢筍菹魚醢

註曰芹楚葵也鄭司農云深蒲蒲弱入水深故曰深

蒲醢醢肉醬也落水中魚衣玄謂深蒲蒲始生水中

子落箭萌筍竹萌 落音迨筍息尹反弱音弱

羞豆之實馳食糝食

註曰馳餐也內則曰取稻米舉糝漉之小切狼臠膏
以與稻米為餐又曰糝取牛羊豕之肉三如一小切
之與稻米稻米二肉一合以為餌煎之 食音嗣餐
之然反糝思柳反漉所柳反臠昌蜀反

凡祭祀共薦羞之豆實賓客喪紀亦如之

為王及后世子共其內羞王舉則共醢六十甕以五齊

七醢七菹三醢實之

註曰齊當為齋五齋昌本脾析蜃豚拍深蒲也七醢醢羸蠃蜆魚兔鴈醢七菹韭菁茆葵芹落筍菹三醢麋鹿麋鷄也凡醢醬所和細切為齋全物若牒為菹少儀曰麋鹿為菹野豕為軒皆牒而不切麋為辟雞兔為宛脾皆牒而切之切葱若薤實之醢以柔之由此言之則齋菹之稱菜肉通 疏曰此以下與籩人異以其王舉不共籩實唯有豆實 齊子西反軒音

獻辟必亦反薤音械

賓客之禮共醢五十壺

註曰致饗餼時 疏曰案秋官掌客上公之禮醢醢

百有二十壺侯伯百壺子男八十壺此共醢五十壺
并醢人所共醢五十壺共為百壺惟據侯伯饗餼之
禮舉中言之明兼有上公與子男掌客上公已下乃
諸侯相待禮天子待諸侯亦與之同又案聘禮待聘
臣亦云醢醢百壺得與諸侯同者彼別為臣禮禮有

損之而益故子男之卿百饗其數多于君

凡事共醢

醢人掌共五齊七菹凡醢物以共祭祀之齊菹凡醢醬之物賓客亦如之

齊菹醬三者皆須醢成味故與醢人共掌之醬即醢醬也賓客亦如之者下云賓客之禮據饗餼此云賓客據饗食致之齊子兮反下同

王舉則共齊菹醢物六十饗共后及世子之醬齊菹賓

客之禮共醢五十竊凡事共醢

鹽人掌鹽之政令以共百事之鹽

註曰政令謂受入教所處置求者所當得

祭祀共其苦鹽散鹽

疏曰杜子春讀苦為鹽鹽謂出于鹽池今之顯鹽是也散鹽煮水為之出于東海

賓客共其形鹽散鹽王之膳羞共飴鹽后及世子亦如之

註曰飴鹽鹽之恬者今戎鹽有焉 疏曰即石鹽也

凡齊事鬻鹽以待戒令

註曰齊事和五味之事鬻鹽涑治之 鄭剛中曰先

王于鹽只以為祭祀賓客膳羞之用初不以為富國之資故周禮一書理財居半鹽獨無賦自管仲以後寔以為富國之資遂至官與民爭利豈先王之意哉

齊才細反鬻音煮涑音練

冪人掌共巾冪

註曰共巾可以覆物 冪莫厯反

祭祀以疏布巾冪八尊

註曰以疏布者天地之神尚質 疏曰舉天地則四望山川社稷林澤皆用疏布皆是尚質之義也 坡謂尊之名六而曰八尊者案春官司尊彝春祠夏禴獻象皆兩之則四尊也皆有壘則四壘尊也與上四尊共八尊獻象四尊以盛泛醴盎醢四齊在堂上即禮運所云醴醖在戶粢醢在堂是也四壘尊一壘以

盛沈齊三壘以盛三酒俱在堂下禮運云澄酒在下
鄭註云澄是沈齊酒是三酒是也烝嘗間祀亦然

以畫布巾幕六彝

註曰宗廟可以文畫者畫其雲氣與疏曰此舉六
彝對上經八尊無鬱鬯以言宗廟有鬱鬯其實天地
亦有秬鬯之彝用疏布宗廟亦有八尊亦用畫布互
舉以明義也獻音涉秬音矩

凡王巾皆黼

言凡非一四飲三酒籩豆俎簋之屬巾皆用黼黼者
繪以斧形近刃白近罍黑周尚武其用文德則黻可

黼音甫罍曲恭反

周禮述註卷三

欽定四庫全書

周禮述註卷四

安溪李光坡撰

○宮人掌王之六寢之脩

註曰六寢者路寢一小寢五路寢以治事小寢以時
燕息焉 疏曰諸侯則三寢路寢一燕寢一側室一
脩掃除也

○為其井匾除其不蠲去其惡臭

井漏井所以受穢今之滲坑匿豬今之陰溝說文匿
匿也蠲猶潔也 匿於建反蠲古玄反滲所識反豬

音諸

共王之沐浴凡寢中之事埽除執燭共爐炭凡勞事

註曰勞事勞褻之事 埽埽本字

四方之舍事亦如之

註曰從王適四方及會同所舍 易氏曰夙興夜寐

洒掃庭內衛武以為荒耽之警子有庭內弗洒弗掃

晉昭以不能修正國之道朝廷內外之肅正君臣上
下儆戒之機豈細故哉

○掌舍掌王之會同之舍設桎桓再重

桎桓謂行馬設三木中聯之交互樹之以為遮欄行
馬再重者以周衛有內外別 疏曰此桎桓所施唯
據下文車宮墮宮止宿而言其惟宮無宮暫止之間
未必有此桎桓也

○設車宮轅門

註曰謂王行止宿險阻之處備非常次車以為藩則仰車以其轅表門

○為壇壝宮棘門

謂王行止宿平地築壇壝邊低垣圍繞者曰壝棘門以戟為門

○為帷宮設旌門

註曰謂王行晝止有所展肆若食息張帷為宮則樹旌以表門

○無宮則共人門

註曰謂王行有所逢遇若佳遊觀陳列周衛則立長大之人以表門

○凡舍事則掌之

註曰王行所舍止 桎步禮反板戶故反重直龍反

璫唯季反

○幕人掌帷幕幄帟綬之事

王出宮則有是事帷在旁施之像土壁也幕則帷上

張之像舍屋也帷幕皆以布為之四合像宮室曰幄
王所居之帳也帷幕之內設之帟主在幕若幄中坐
上承塵幄帟皆以繒為之綬條也凡四物者以綬連
繫焉 幄烏學反帟音亦條音叨

凡朝覲會同軍旅田役祭祀共其帷幕幄帟綬

註曰共之者掌次當以張

大喪共帷幕帟綬

註曰為賓客飾也帷以帷堂或與幕張之于庭帟在

樞上

三公及卿大夫之喪共其帟

註曰唯士無帟王有惠則賜之檀弓曰君於士有賜帟疏曰此云三公不云諸侯與孤下掌次云諸侯與孤不云三公者三公即是諸侯再重此不云孤孤與卿大夫同不重幕人不張故畧不言

○掌次掌王次之灋以待張事

註曰灋大小丈尺疏曰待張事者王出則幕人以

帷與幕等送至停所掌次張之

王大旅上帝則張氊案設皇邸

註曰大旅上帝祭天於圜丘國有故而祭亦曰旅此以旅見祀也張氊案以氊為牀于幄中鄭司農云皇羽覆上邸後版也玄謂後版屏風與染羽象鳳皇羽色以為之疏曰案謂牀也牀上著氊即謂之氊案鄭云于幄中則知不徒設氊案皇邸而已明知并有大次小次之幄與下祀五帝互見之也

○朝日祀五帝則張大次小次設重帟重案合諸侯亦如之

註曰朝日春分拜日于東門之外祀五帝于四郊次謂幄也大幄初往所止居也小幄謂接祭退侯之處祭義曰周人祭日以朝及闇雖有強力孰能支之是以退侯與諸臣代有事焉合諸侯于壇王亦以時休息重帟復帟重案牀重席也鄭司農云五帝五色之帟疏曰大幄小幄幄在幕中既有幄明有帷幕可

知云重案不言璫及皇邸亦有可知上璫案不言重
席亦有重席可知互見為義 邸當禮及朝直遙反
註同著直畧反

師田則張幕設重帟重案

註曰不張幄者於是臨誓衆王或回顧瞻察

諸侯朝覲會同則張大次小次

註曰大次亦初往所止居小次即宮待事之處 疏
曰此謂與諸侯張之四時常朝在國內今言朝覲會

同為會同而來故在國外與大宰大朝覲會同一也
王於合諸侯如祭祀則諸侯從王祭祀亦與會同同
○師田則張幕設案

疏曰承上諸侯謂諸侯從王而師田者則掌次為張
之案不言重則無重席亦應有單席也

孤卿有邦事則張幕設案

註曰有邦事謂以事從王若以王命出也孤王之孤
三人副三公論道者不言公公如諸侯禮從王祭祀

合諸侯張大次小次師田亦張幕設案

凡喪王則張帟三重諸侯再重孤卿大夫不重

註曰張帟樞上承塵 疏曰言凡者以其王已下至

大夫兼有后及三夫人已下后與王同三重世子三夫人與諸侯再重九嬪二十七世婦與孤卿大夫同不重一而已八十一御妻與士同無帟有賜乃得帟也此諸侯謂三公王子母弟若畿外諸侯掌次不張之

凡祭祀張其旅幕尸次

註曰旅衆也公卿以下即位所祭祀之門外以待事
為之張大幕尸則有幄鄭司農云尸次祭祀之尸所
居更衣帳

射則張耦次

註曰耦俱升射者次在洗東大射曰遂命三耦取弓
矢于次疏曰天子大射六耦在西郊賓射亦六耦
在朝燕射三耦在寢此六耦三耦據諸侯射者若衆

耦則多但無常數耳

掌凡邦之張事

史直翁曰帷幕幄帶所用非一處用罷則徹之而復用其為費亦小矣後世離宮別館竭萬家生養之資為一日巡幸之備嗚呼無惑乎生民息肩之無日也
○大府掌九貢九賦九功之貳以受其貨賄之入頒其貨于受藏之府頒其賄于受用之府

九功謂九職也內府曰受藏外府曰受用凡貨賄皆

藏以給用耳或言受藏或言受用又雜言貨賄皆互文

○凡官府都鄙之吏及執事者受財用焉

執事謂為官執掌其事須有營造合用官物者三者皆受于大府而大府頒之故下文遂言頒財藏才浪反註受藏同

凡頒財以式灋授之關市之賦以待王之膳服邦中之賦以待賓客四郊之賦以待稍秣家削之賦以待匪頒

邦甸之賦以待工事邦縣之賦以待幣帛邦都之賦以待祭祀山澤之賦以待喪紀幣餘之賦以待賜予

註曰待猶給也此九賦之財給九式者膳服即羞服也稍秣即芻秣也謂之稍稍用之物也喪紀即喪荒也賜予即好用也鄭司農云幣餘使者有餘來還也

坡謂以九賦待九式者酌其所費之豐約而以所入之多少當之關市之賦列于首尊王者之膳服也邦甸序在家削之先今次于下恐或文錯秣音末

削稍去聲予音與後凡賜予同好呼報反使色吏反
凡邦國之貢以待弔用

註曰此九貢之財所給也給弔用給凶禮之五事

疏曰案大行人六服因朝所貢之物與大宰九貢歲
之常貢雖曰時節不同貢物有異要亦入弔用之數
凡萬民之貢以充府庫

註曰此九職之財充猶足疏曰九貢言入弔用九
賦言入九式有餘財亦入府庫

凡式貢之餘財以共玩好之用凡邦之賦用取具焉

此謂先給九式及弔用足府庫而有餘財乃可以共
玩好玩好非共耳目之玩也宗廟之鎮器天府之守
器諸侯之分器皆取于是以其可玩也故曰玩好言
式言貢互文賦用用賦也凡邦之賦用取具如軍旅
之費田役施惠之費百府有司祿廩之費凡九式所
不載者皆取具于式貢之餘財也

歲終則以貨賄之入出會之

會古外反

或問此官有九賦九功之別司會有田野民職之
令取于民者有二焉鄭君以九功為九職之貢以
九賦為口率出泉信乎曰口率出泉漢灋也秦廢
井田始舍地而稅人漢因而不改豈可以為斷于
經乎班固食貨志曰有賦有稅稅謂公田什一及
工商虞衡之入也顏師古註之曰賦謂計口發財
合斯二者與鄭君之云不少異焉朱子井田類說

中引用班固之言是然之與雖然愚竊疑之既借其力以稅什一復計其口而算之衆乃追求無藝即頭會箕歛不當復譏之是乃先王之制矣愚嘗攷諸司徒政斂之官所得于民似有貢賦二事載師職云園廛二十而一之等即此九賦也閭師職云命農以耕事貢九穀之等即此九功也園廛二十而一之等曰任地與司會以九賦令田野之財用一也命農貢九穀之等曰任民與司會以九功

令民職之財用一也聞之曰不責之賦則將有地
不毛有田不耕而不能無曠土不使之貢則將不
畜不種不耕不蠶而不能無游民斯言殆得之矣
曰既有地畝之征又有九穀之貢是取于公而又
斂其私也然則魯宣稅畝何以譏其初曰九賦所
稅入者上之宜得也於私田非有取焉百畝之產
其制民厚矣彼農于四時之間高原下隰所宜種
而有得者則貢之等諸烹葵剝棗致其愛耳等諸

工商嬪婦致其有耳豈橫斂歟且不著其數蓋惟
視有無不責多寡是亦微矣稅畝之云未之思耶
曰似矣九賦有山澤之賦有關市之賦而閭師又
有商貢貨賄衡貢山物虞貢澤物然則賦貢將何
別曰九賦之山澤者山農澤農也關市之征廛布
也閭師山澤之貢則絺紵羽翮之等關市之貢則
財征也是亦別矣曰言邦中四郊甸稍縣都則山
田澤田舉之矣何以特出山澤而別為賦目與曰

有二說焉山澤高下其經界制畝之方與夫天期
地澤之利皆不同平土故楚司馬爲掩度山林鳩
數澤牧隰臯井沃衍皆別爲經治猶此意也又王
者封國名山大澤不以封山澤利遍九州爲賦至
廣不盡于畿內所有而已此所以別也 或問九
賦以待九式九貢以待弔用其用悉矣藉有所餘
何足以當師田祿廩之大事乎曰以某財待某事
先王示人有節之道耳非必盡用也王畿百同之

地所入至廣邦國之貢為財亦多如九式者天子
既儉于自奉至于待人事神禮雖從豐亦灋無過
濫邦國弔用不時之舉度其財之所出未足以費
其所入之四五也曰師田祿廩何以不為式曰祿
廩至繁不可限以一賦軍旅無常不可待以經賦
故不為式也曰或謂周官軍旅之行皆人自齎糧
信乎曰是何言與軍旅之行廩人給之米穀外府
與之邦布遺人待以委積委人共其薪蒸木材皆

上之為之也言自齋者徵以何文乎嗚呼語焉不
詳厲民者豈徒國服之息 薦音委

○玉府掌王之金玉玩好兵器凡良貨賄之藏

註曰良善也此物皆式貢之餘財所作 好呼報反
藏才浪反

其王之服玉佩玉珠玉

記云大圭長三尺天子服之服玉大圭也佩玉佩于
草帶之上佩玉有蔥衡衡橫也以蔥玉為橫梁又以

組縣于衡之兩頭兩組之末皆有半璧曰璜以一組
縣于衡之中央于末著衡牙使前後觸璜衡璜之外
別有琚瑀琚瑀所置在縣衡牙組之中央又以兩組
穿于琚瑀之內角斜繫于衡之兩頭于組末繫于璜
凡組繩五皆蠙珠以內其間珠玉琢玉為珠也王之
五冕旒數不同而玉皆十二又有皮弁韋弁冠弁其
會玉亦十二 著直畧反琚音居瑀音羽縣音懸以
內之內音納

王齊則共食玉

註曰玉是陽精之純者食之以禦水氣鄭司農云王

齊當食玉屑

齊音齋

大喪共含玉復衣裳角枕角柶

含玉璧形而小以為口實復招魂也衣裳生時服角

枕以枕尸角柶角匕也以楔齒楔齒者令可飯含

含戶暗反註同楔先結反飯扶晚反

掌王之燕衣服衽席牀第凡褻器

註曰燕衣服者巾絮寢衣袍禪之屬皆良貨賄所成
第簣也鄭司農云衽席單席也褻器溲器虎子之屬

第側姜反禪音澤

若合諸侯則共珠槃玉敦

註曰敦槃類珠玉以為飾合諸侯者必割牛耳取其
血歃之以盟珠槃以盛牛耳尸盟者執之玉敦歃血
玉器疏曰合諸侯者謂時見曰會鄭剛中曰周
公當成周盛時六服羣辟罔不承德而設官使共合

諸侯獻血之器何耶聖人防患之意以為盛者有時而衰合者有時而散故盟會獻血之事亦有時而不免然則待衰世慮後患遠矣 敦音對盛斗之盛音成見音現

凡王之獻金玉兵器文織良貨賄之物受而藏之

註曰謂百工為王所作可以獻遺諸侯古者致物於人尊之則曰獻通行曰饋春秋傳曰齊侯來獻戎捷尊魯也文織畫及繡錦 織音志

凡王之好賜共其貨賄

疏曰謂王于羣臣有恩好因燕飲而賜之者也 王

介甫曰此旣言共王好賜之貨賄內府又言共王及
冢宰之好賜予者凡王以王府所受好賜王府共之
以內府所受好賜內府共之

○內府掌受九貢九賦九功之貨賄良兵良器以待邦
之大用

受受之大府也良兵謂弓矢及矛戈戟五兵之良者

良器謂車乘及禮樂器之善者此冬官所作亦由大府而來大用九式及弔用也 又音殊

凡四方之幣獻之金玉齒革兵器凡良貨賄入焉

註曰諸侯朝聘所獻國珍 疏曰此因朝聘而貢先

入于掌貨賄入其要于大府乃始通之于內府也

陳及之曰玉府內府所掌金玉兵器良貨賄一也必分于二官者蓋玉府所掌皆式貢餘財所作及獸人漁人所入之物專以共王玩好及賜予耳邦之大用

不與焉內府所掌乃九貢九功之貨賄及諸侯所獻國珍皆公家物以待邦之大用所以分于二官 好呼報反下同與音預

凡適四方使者共其所受之物而奉之

適四方使者謂使公卿大夫聘問諸侯若大行人間問省類之等物疏云即王府王之獻金玉已下是也或云即所受之幣獻以貽之蓋各以國之所無者分錯交送 坡謂二說相須其義始備 使所吏反類

音眺

凡王及冢宰之好賜予則共之

註曰冢宰待四方賓客之小治或有所善亦賜予之
○外府掌邦布之入出以共百物而待邦之用凡有灋
者

註曰布泉也布讀為宣布之布其藏曰泉其行曰布
取名于水泉其流行無不徧入出謂受之復出之共
百物者或作之或買之待猶給也 坡謂邦用有灋

者如下文所云皆是也此官掌藏國家鼓鑄之布然
九賦九功之稅民有不出粟米麻絲而或以布代者
當亦入于此府

共王及后世子之衣服之用凡祭祀賓客喪紀會同軍
旅共其財用之幣齋賜予之財用

註曰齋行道之財用也聘禮曰問幾月之齋鄭司農
云齋或為資今禮家定齋作資玄謂齋資同耳其字
以齊次為聲從貝變易古字亦多或疏曰賜予之

財用亦謂王于羣臣有所恩好賜予之也 齎音咨

好呼報反

凡邦之小用皆受焉

註曰皆來受 疏曰外府所內泉布所積既少有小

用則給之若大用即取餘府 內音納

歲終則會唯王及后之服不會

○司會掌邦之六典八灋八則之貳以逆邦國都鄙官府之治以九貢之灋致邦國之財用以九賦之灋令田

野之財用以九功之灋令民職之財用以九式之灋均節邦之財用

九賦令田野者有田則有賦也九功令民職者有職則有貢也詳在地官載師閭師二職自六典至九式七者皆冢宰掌其正司會則執其貳以佐之如此也會古外反下同

掌國之官府郊野縣都之百物財用凡在書契版圖者之貳以逆羣吏之治而聽其會計

註曰郊四郊去國百里野甸稍也甸去國二百里稍
三百里縣四百里都五百里書謂簿書契其最凡也
版戶籍也圖土地形象田地廣狹疏曰此書契版
圖下文司書掌其正此司會主鉤攷故掌其副貳
徐氏曰百物財用皆有書契版圖焉案以鉤校其征
斂之虧完放散存積之多少吏治之寬刻廉貪也
坡謂此節承九賦九功九式三者上既令之此則逆
而聽之也鉤居侯反

以參互攷日成以月要攷月成以歲會攷歲成

坡謂宰夫職歲終則令羣吏正歲會月終則令正月
要旬終則令正日成而以致其治則此經不獨言會
計財用之灋乃承上文掌八灋八則以逆官府都鄙
之治者如此也參互相參交互也

以周知四國之治

坡謂周猶徧也承上文以六典逆之以九貢致之所
以周知四國之治否也

○以詔王及冢宰廢置

坡謂總結上文

○司書掌邦之六典八灋八則九職九正九事邦中之版土地之圖

九正謂九貢九賦正稅也九事九式也以用財言之則曰式以用財所為之事言之則曰事一也此一經為下文之總目疏曰此所掌與司會同者以其司會主鈎攷司書掌書記之司書所記司會鈎攷之故

二官所掌其事通焉 正音征註同

以周知入出百物以敘其財受其幣使入于職幣

敘猶比次也受謂受錄其餘幣而為之簿書使之入于職幣也夫九職九正百物之入也知其入以敘其財者職內事也九事百物之出也知其出以敘其財者職歲事也受其餘幣而藏之者職幣事也司書為三官書記之長故周知之受之

○凡上之用財用必攷于司會

註曰上謂王與冢宰王雖不會亦當知多少而闕之
司會以九式均節邦之財用 坡謂以周知至此即
司會所掌官府之百物財用也 長音掌

三歲則大計羣吏之治以知民之財器械之數以知田
野夫家六畜之數以知山林川澤之數以逆羣吏之徵
令

註曰械猶兵也逆受而鉤攷之山林川澤童枯則不
稅 疏曰三年一閏天道小成攷校羣吏須有黜陟

知民之財器已下川澤已上恐其羣吏濫徵斂萬民
故知此本數乃鉤攷其徵令也 坡謂此一經即司
會所掌郊野縣都之百物財用也以知民財已下以
書契版圖知之也 李景齊曰豳風陳王業孟子論
王道可見古人皆以民事為先吾觀冢宰三歲大計
意其必功過之大者至司書之職而後知其所計者
但如此耳先王之致意于民事何如也後世課羣吏
者責辦賦稅與夫簿書獄訟之末民生之厚與否田

野之闢與否不恤也安識成周計吏之本意

凡稅斂掌事者受灋焉及事成則入要貳焉

註曰灋猶數也應當稅者之數成猶畢也疏曰凡

稅斂者謂若地官閭師旅師徵斂之官必來受灋又
入要貳者以司書知財器已下之數擬後鉤攷之也

凡邦治攷焉

以其自六典至版圖無不掌其書故皆此乎攷也

○職內掌邦之賦入辨其財用之物而執其總以貳官

府都鄙之財入之數以逆邦國之賦用

掌賦入者謂九職九貢九賦之稅入皆掌之賦乃總
名下言賦者皆此類也辨財用之物處之使種類相
從總謂簿書之種別與大凡官府財入謂內府外府
之屬凡入貨賄者皆是都鄙財入蓋縣都財賦留
其處以待用而其副皆在職內賦用用賦也

凡受財者受其貳令而書之

受財受于大府也貳令者大府一令與其人為信至

某府受財一為副令下職內登書以備鉤攷若今時之有存案

及會以逆職歲與官府財用之出

疏曰職歲主出職內主入以已入財之數鉤攷職歲出財之數與職歲出財與官府所用之數並鉤攷之也
會古外反

而敘其財以待邦之移用

註曰亦鉤攷今藏中餘見為之簿移用謂轉運給他

坡謂詳此官竝非職藏之府夫內府掌貢賦外府掌邦布財之良不良皆舉之矣安得更有不良者藏自職內乎且內府外府掌其入亦掌其出則未知職歲之所出又果何財也然則職內職歲二官與司會司書為類明是掌文書以鈎攷出入之會計竝無府義也鄭子以為府者蓋因職幣振斂餘財以例此二官故以為府耳然而可疑矣 藏才浪反藏自之藏讀本字內音納

○職歲掌邦之賦出以貳官府都鄙之財出賜之數以待會計而攷之

註曰以貳者亦如職內書其貳令而編存之出出以給用也賜用以賜予也

凡官府都鄙羣吏之出財用受式灋于職歲

註曰百官之公用式灋多少職歲掌出之舊用事存焉 坡謂以出數之貳在此也

凡上之賜予以敘與職幣授之

註曰欲受賜者之尊卑 坡謂以賜數之貳在此也

及會以式灋贊逆會

疏曰司會逆羣吏之治而聽其會計此官主式灋出財用故以此助之

○職幣掌式灋以斂官府都鄙與凡用邦財者之幣

註曰幣謂給公用之餘凡用邦財者謂軍旅

○振掌事者之餘財

振收也掌事謂以王命有所作為上斂幣者日用經

費之餘也此振財者有興作之事而餘也言斂言振
變易句名

○皆辨其物而奠其錄以書楬之以詔上之小用賜予

註曰奠定也定其錄籍鄭司農云楬之若今時為書

以著其幣 楬其列反著張恕反

歲終則會其出凡邦之會事以式灋贊之

○司裘掌為大裘以共王祀天之服

註曰鄭司農云大裘黑羔裘服以祀天示質 疏曰

祭服皆玄上纁下明此裘亦羔之黑者大裘之上又
有玄衣與裘同色 坡謂直言祀天不及于地經既
無文註亦不言惟疏云崑崙神州亦用大裘程子曰
元祐時議北郊只為五月間天子不可服大裘皆以
為難行案宗伯司服云祀昊天上帝則服大裘而冕
祀五帝亦如之若以五月祀地大裘難服則四月亦
帝六月黃帝服之其可乎蓋祀地之時其冕如大裘
之冕其服如大裘上之玄衣玄衣之內不復有大裘

也赤帝黃帝疑亦當爾故楊氏曰蒼璧黃琮以象天
地之性者不容不具冕服王之所服以事天地不容
不同但夏至不用大裘耳屨人之屨猶辨四時之宜
則冕服可知矣斯言是也又聞之兄云社者祭地司
服云祭社稷以希冕則希冕祭地昭然矣若以父天
母地冕服不宜下于四望山川則諸侯相待子男醢
醢八十壘至待聘卿子男之卿亦百壘臣乃多君何
與禮有損之而益王者尊天親地未可以泥也存

此二說以俟正焉

鱣音熏

中秋獻良裘王乃行羽物

註曰良善也中秋鳥獸毼毼因其良時而用之鄭司
農云良裘王所服也玄謂良裘王藻所謂黼裘與羽
物小鳥鷦鷯之屬鷹所擊者中秋鳩化為鷹中春鷹
化為鳩順其始殺與其將止而大班羽物 疏曰為
八月誓獮田所用故獻之

○季秋獻功裘以待頒賜

註曰功裘人功微猶謂狐青麕裘之屬鄭司農云功

裘卿大夫所服 中音仲註同毳音毛毳先典反鷩

音淳猶息淺反猶麕同音粗麕音迷

王大射則共虎侯熊侯豹侯設其鵠諸侯則共熊侯豹
侯卿大夫則共麋侯皆設其鵠

註曰大射者為祭祀射王將有郊廟之事以射擇諸
侯及羣臣與邦國所貢之士可以與祭者射者可以
觀德行其容體比于禮其節比于樂而中多者得與

於祭諸侯謂三公及王子弟封于畿內者卿大夫亦皆有采地焉其將祀其先祖亦與羣臣射以擇之凡大射各于其射宮侯者其所射也以虎熊豹麋之皮飾其側又方制之以為準謂之鵠著于侯中所謂皮侯王之大射虎侯王所自射也熊侯諸侯所射豹侯卿大夫以下所射諸侯之大射熊侯諸侯所自射豹侯羣臣所射卿大夫之大射麋侯君臣共射焉凡此侯道虎九十弓熊七十弓豹麋五十弓列國之諸侯

大射大侯亦九十糝七十紆五十遠尊得伸可同耳
所射正謂之侯者天子中之則能服諸侯諸侯以下
中之則得為諸侯侯中之大小取數于侯道鄉射記
曰弓二寸以為侯中則九十弓者侯中廣丈八尺七
十弓者侯中廣丈四尺五十弓者侯中廣一丈考工
記曰梓人為侯廣與崇方參分其廣而鵠居一焉然
則侯中文八尺者鵠方六尺侯中文四尺者鵠方四
尺六寸大半寸侯中一丈者鵠方三尺三寸少半寸

謂之鵠者取名于鵠鵠鵠小鳥而難中是以中之
為雋亦取鵠之言較較者直也射所以直已志用虎
熊豹麋之皮示服猛討迷惑者射者大禮故取義衆
也士不大射士無臣祭無所擇 疏曰此經不云狐
狐六命亦與卿同 與音預下得與同行下孟反此
毗志反下同中丁仲反下天子中之以下中之而難
中以中皆同所射之射食亦反下自射所射共射皆
同正音征下同豻音鴈鴈音鴈

大喪廬裘飾皮車

註曰皮車遣車之草路廬興也若詩之興謂象似而作之凡為神之偶衣物必洁而小耳疏曰裘謂明器中之裘即上良裘功裘等飾皮車者亦謂明器之車以皮飾之廬音歆興去聲

凡邦之皮事掌之歲終則會唯王之裘與其皮事不會
○掌皮掌秋斂皮冬斂草春獻之

註曰皮草踰歲乾久乃可用獻之獻其良者于王以

入司裘給王用 疏曰獸皮治去其毛曰革秋斂皮者鳥獸毛毳之時其皮善故秋斂之革須治用功深故冬斂之

遂以式灋頒皮革于百工

疏曰良者入司裘其餘入百工因上事故云遂也式灋作物所用多少故事百工者冬官裘氏韋氏函人之類用皮者也

其其毳毛為氈以待邦事

毳毛毛細縹者共與冬官使作氍毹掌次也邦事祭
祀合諸侯之事

歲終則會其財齋

註曰財斂財本數及餘見者齋所給予人以物曰齋
今時詔書或曰齋計吏 疏曰財與齋二者竝據皮
革而言 見賢遍反予音與

○內宰掌書版圖之灋以治王內之政令均其稍食分
其人民以居之

註曰版謂宮中閤寺之屬及其子弟錄籍也圖王及
后世子之宮中吏官府之形象也政令謂施閤寺者
稍食吏祿廩也人民吏子弟分之使衆者就寡均宿
衛 疏曰書書之于版也內宰所均稍食謂閤寺及
子弟宿衛後宮者宮正所均謂宿衛王宮者 易彥
祥曰秋官掌戮云宮者使守內蓋王內之職惟內小
臣奄四人為上士其餘皆非命士則皆人民也

以陰禮教六宮

註曰鄭司農云陰禮婦人之禮玄謂六宮謂后也婦人稱寢曰宮宮隱蔽之言后象王立六宮而居之亦正寢一燕寢五教者不敢斥言之謂之六宮若今稱皇后為中宮矣昏禮毋戒女曰夙夜毋違宮事

○以陰禮教九嬪

註曰教以婦人之禮不言教夫人世婦者舉中省文○以婦職之灋教九御使各有屬以作二事正其服禁其奇衺展其功緒

註曰婦職謂織經組紉縫線之事九御女御也九九而御于王因以號焉使之九九為屬同時御又同事也正其服止踰侈奇衰若今媚道展猶錄也緒業也二事謂絲枲之事疏曰上文世婦以上皆直言陰禮不言職此言職者以其世婦已上貴無絲枲等職業之灋故也案詩註云王后織玄紞公侯夫人紃經卿之內子大帶大夫命婦成祭服士妻朝服庶人已下各衣其夫貴賤皆有職者彼示雖貴無得遊手率

先之意非如此絲枲二事責其功緒也 毋違之毋
音無絰女金反組音祖紉似倫反統都感反絃音橫
絰音延

大祭祀后裸獻則贊瑤爵亦如之

註曰謂祭宗廟王既裸后乃從後裸也祭統曰君執
圭瓚裸尸大宗執璋瓚亞裸謂夫人不與而攝耳獻
謂王薦腥薦熟后亦從後獻也瑤爵謂尸卒食王既
醕尸后亞獻之其爵以瑤為飾

○正后之服位而詔其禮樂之儀

註曰薦徹之禮當與樂相應位謂房中戶內及阼所立處疏曰服謂禕衣已下六服正之使服當其用

○贊九嬪之禮事

註曰助九嬪贊后之事九嬪者贊后薦玉盥薦徹豆籩不與之與音預禕音揮

凡賓客之裸獻瑤爵皆贊

註曰謂王同姓及二王之後來朝覲為賓客者裸之

禮亞王而禮賓獻謂王饗燕亞王獻賓也瑤爵所以
亞王酬賓也坊記曰陽侯殺繆侯而竊其夫人故大
饗廢夫人之禮

○致后之賓客之禮

賓客謂諸侯來朝覲及畿內同姓諸侯之夫人會見
王后皆是也禮謂牢禮致禮者使下大夫此內宰下
大夫也 繆音穆

凡喪事佐后使治外內命婦正其服位

註曰使使其屬之上士內命婦謂九嬪世婦女御鄭
司農云外命婦卿大夫之妻王命其夫后命其婦玄
謂士妻亦為命婦 疏曰喪言凡則王及后世子以
下皆是服位者服之精猶位之先後

凡建國佐后立市設其次置其敘正其肆陳其貨賄出
其度量淳制祭之以陰禮

市朝者君所以建國也建國者必面朝後市王立朝
而后立市陰陽相承之義次謂吏所治舍司次介次

也敘市行列也正其肆者物各異肆正之使不雜也
陳猶處也謂有諸物皆陳列之度丈尺也量豆區之
屬淳謂幅廣也制謂匹長淳制天子巡狩禮所云制
幣丈八尺純四咫也陰禮婦人之祭禮一曰陰禮者
市中之社先后所立社也王次點曰此特體地道
以始立市耳既立則后何預其事純諸允反

中春詔后帥外內命婦始蠶于北郊以為祭服

註曰蠶于北郊婦人以純陰為尊郊必有公桑蠶室

焉 張敬夫曰嘗攷周家立國自后稷以農為務歷
世相傳其君子則重稼穡之事其室家則躬織紉之
勤相與咨嗟嘆息服習乎艱難咏歌乎勞苦此實王
業之根本也故誦服之無數之章則知周之所以興
誦休其蠶織之章則知周之所以衰以是意而攷後
世治亂成敗之原皆可得而見矣 中音仲數音亦
歲終則會內人之稍食稽其功事

內人主謂九御功事絲枲之事既均其稍食歲終則

會之既展其功緒歲終則稽之

○佐后而受獻功者比其小大與其麇良而賞罰之

註曰獻功者九御之屬典婦功曰及秋獻功王介

甫曰小大比其制麇良比其功

○會內宮之財用

註曰許夫人已下所用財

正歲均其稍食施其事功憲禁令于王之北宮而糾其

守

註曰均猶調度也施猶班也北宮后之六宮謂之北宮者繫于王言之明用王之禁令令之守宿衛者憲音懸度待洛反或如字

上春詔王后帥六宮之人而生種稑之種而獻之于王
註曰六宮之人夫人以下分居后之六宮者古者使后宮藏種以其有傳類蕃孳之祥必生而獻之示能育之使不傷敗且以佐王耕事共禘郊也鄭司農云先種後熟謂之種後種先熟謂之稑王當以耕種于

藉田玄謂詩云黍稷種稔是也夫人以下分居后之
六宮者每宮九嬪一人世婦三人女御九人其餘九
嬪三人世婦九人女御二十七人從后唯其所燕息
焉從后者五日而沐浴其次又上十五日而徧云夫
人如三公從容論婦禮疏曰上春者亦謂正歲以
其春事將興故云上春也種直龍反稔音六種章
勇反孳音茲

○內小臣掌王后之命正其服位

註曰命謂使令所為或言王后或言后通耳

○后出入則前驅

疏曰此小臣是奄人與后導道是其常也

若有祭祀賓客喪紀則擯詔后之禮事相九嬪之禮事
正內人之禮事徹豆之俎

註曰擯為后傳辭有所求為詔相正者異尊卑也俎
謂后受尸之爵飲于房中之俎 疏曰詔相正皆是
上擯但據尊卑不同故以詔相別之 相息諒反註

同

后有好事于四方則使往有好令于卿大夫則亦如之

註曰后於其族親所善者使往問遺之 邱氏曰好

事以財問遺也好令以言問勞也好呼報反下同

遺唯季反勞去聲

掌王之陰事陰令

註曰陰事羣妃御見之事若今掖庭令畫漏不盡八

刻日錄所記推當御見者陰令王所求為于北宮

見賢通反

○閤人掌守王宮之中門之禁

中門于外內為中雉門也王有五門外曰皋門二曰庫門三曰雉門四曰應門五曰路門路門一曰畢門坡謂上序官言每門此言中門者蓋舉中以例之

喪服凶器不入宮潛服賊器不入宮奇服怪民不入宮

註曰喪服衰經也凶器明器也潛服若衷甲者賊器盜賊之任器兵物皆有刻識奇服衣非常怪民狂易

識式志反易以豉反

凡內人公器賓客無帥則幾其出入以時啓閉

註曰三者之出入當須使者符節乃行鄭司農云公器將持公家器出入者幾謂無將帥引之者則苛其出入時漏盡使色吏反將子匠反苛呼河反

凡外內命夫命婦出入則為之闢

註曰辟行人使無干也內命夫卿大夫士之在宮中者

掌埽門庭

註曰門庭門相當之地 疏曰閤人掌中門唯中門
外之地謂之門庭也若餘門庭則各有守門者埽之
大祭祀喪紀之事設門燎蹕宮門廟門

註曰燎地燭也蹕止行者廟在中門之外 疏曰喪
紀朝廟及出葬之時燎天子百公五十侯伯子男皆
三十所作之狀蓋百根葦皆以布纏之以蜜塗其上
若今蠟燭矣

凡賓客亦如之

疏曰賓客在宮中廟中謂若享食在廟燕在寢

○寺人掌王之內人及女宮之戒令相道其出入之事而糾之

註曰內人女御也女宮刑女之在宮中者糾猶割察也相息亮反下同道徒報反

若有喪紀賓客祭祀之事則帥女宮而致於有司

註曰有司謂宮卿世婦

佐世婦治禮事

註曰世婦二十七世婦

掌內人之禁令

內小臣於祭祀三者正內人之禮事此則禁令之使
之如小臣所正也

凡內人弔臨於外則帥而往立于其前而詔相之

註曰從世婦所弔或自哭其族親立其前者賤也賤
而必詔相之者出入于王宮不可以闕于禮

○內豎掌內外之通令凡小事

註曰內后六宫外卿大夫也使童豎通王內外之命給小事者以其無與為禮出入便疾內外以大事聞王則俟朝而自復朝直遙反下同

若有祭祀賓客喪紀之事則為內人蹕

註曰內人從世婦有事于廟者內豎為六宮蹕者以其掌內小事疏曰此豎於三事為內人蹕者皆謂在廟時祭祀在廟謂禘祫四時之祭也賓客在廟謂

享食時也喪紀在廟謂喪朝廟為祖奠遣奠時也
王后之喪遷于宮中則前蹕及葬執褻器以從遣車

註曰喪遷者將葬朝于廟褻器振飾頽沐之器 疏

曰及葬執褻器以從遣車者謂朝七廟訖且將行在
太祖廟中為大遣奠苞牲取下體天子九牢苞九個
遣車九乘后亦同使人持之往如墓遣車載牲體鬼
神依之故使執褻器從之 頽呼內反

周禮述註卷四